

## YONASI, KEBISA NTIMA NA NGE!

Mukanda ya Yonasi na baleso 9 sambu na bana  
Par Mama Lorella Rouster

Leso 1. YONASI KE ZOLA TINA NZAMBI  
Yonasi 1:1-4, Bankunga 139:7-10

### KULONGA MIKANDA YA BIBLE:

Bible kele na bandambu zole: Kuwakana ya Ntama, ti Kuwakana ya Mpa. Kuwakana ya Ntama ke songa beto nde Ngulusi ta Kwisa. Kuwakana ya Mpa ke songa beto nde Ngulusi mene Kwisa. Mukanda ya Yonasi ya beto ta mona na bamposo yai, yo ikele na kati ya Kuwakana ya Ntama.

KIKUMA YA LESO: Beto zola bana kubakisa nde bo lenda bumbana ve na meso ya Nzambi, yo yina bo lemvuka na Yandi, bo bumba masumu na bo ve, kansi bo ndima mpe yambula yo.

KUYANTIKA LESO: Songa mpila bana ya fioti ke bumbana. Bo tula maboko na zulu ya meso na bo, ebuna bo banza nde muntu ya nkaka lenda mona bo ve. Sala mwa-theatre ya ke songa mpila bo ke sala yo. Bana ya fioti ke banza bo lenda bumbana. Bo bakisa ve sambu na inki bantu ya nkaka ke seka bo. Bo ke seka sambu bana yina, bo me bumbana ve ata fioti. Bantu kele kumona bo pwelele. Mutubi mosi ya Nzambi mpe zolaka kubumbana. Yandi zolaka kutina Nzambi. Mambu na yandi kele na mukanda ya Yonasi na Bible, ti zina na yandi vandaka mpe Yonasi.

### MAMBU YA NENE YA LESO YAI:

1. Nzambi binga Yonasi Yonasi 1:1-2
  - A. Tanga Yonasi 1:1-2 na malembe yonso
  - B. Nzambi bingaka Yonasi kukwenda wapi? (na Nineve!)
  - C. Bana zole sala theatre kusonga mpila Nzambi bingaka Yonasi.
  - D. Yimba na ton ya "Yesu Azali Awa", to sala na ton ya nge mosi: "Yonasi, Kwenda na Nineve!"
  - E. Tendula Nineve vandaka inki mutindu:
    - Ville ya nene
    - Capitol ya Kimfumu ya Assyrie, ya yalaka bainsi mingi
    - Mbeni ya Bayuda (Yonasi vandaka Muyuda)
    - Bantu ya kwisaka na kunwanina Bayuda
    - Fuluka ya bantu ya mbi ya zolaka ve Nzambi
    - Fuluka ya bantu ya sambaka biteki ti bampeve ya imbi
2. Yonasi tina Nzambi Yonasi 1:3
  - A. Tanga Yonasi 1:3 na malembe yonso.
  - B. Bana sala theatre ya mambu yai:
    - Yonasi kangaka bima na yandi.
    - Yandi kwendaka ntete na Yafa.
    - (Bambuka nde Nzambi songaka yandi kukwenda na Nineve.)
    - Na Yafe, yandi sumbaka tike.
    - Yandi kotaka na masuwa.

Yandi zolaka kwenda na Tarsisi. (Tarsisi kele ntama ti Yafa, na ndambu ya Espagne, mpe na direction ya nkaka. Yo kele bonso Nzambi zolaka Yonasi kukwenda na droit kansi yandi kwendaka na gauch.)

Yonasi zolaka kutina Nzambi! (Bana sala bonso bo ke bumbana.)

C. Nkunga: (Ton kiteso mosi) Yandi lemvukaka ve! (mbala 3) O Mawa!

### 3. Nzambi mona Yonasi Yonasi 1:4

A. Tanga Yonasi 1:4 na malembe yonso.

B. Theatre--Mwana sala bonso yandi kele Nzambi, ke mona Yonasi. Mpila ya kubumbana na meso ya Nzambi ikele ve! Na nima, bana yonso sala bonso bo kele mupepe ya ngolo, mpe bonso bo kele na kati ya masuwa na kintembo ya nene.

C. Nkunga: Nzambi kele mona nge! (mbala 3) Ntangu yai!

Na mposo ke kwisa, beto ta mona inki Yonasi salaka na kati ya kintembo yina. Keti yandi fwaka? Beto ta songa yo na mposo ke kwisa.

VERSE YA KUTUBA: Tanga Bankunga 139:7-10 ya mvimba. Na nima, bana ta tuba verse 7:

Kulonga Verse: Bana tuba yo mbala 6, mutindu yai:

Mbala ya ntete: Bo landa nge na kutuba bitini ya fioti.

Mbala ya zole: Bo landa nge na kukangisa bitini ya bandambu.

Mbala ya tatu: Yula nani kudiaka saka-saka mazono. Bo yonso telema ti tuba verse ya mvimba.

Mbala ya iya: Bo tuba yo ngolo sambu bwala ya nkaka lenda kuwa yo.

Mbala ya tanu: Bana tatu lenda meka kutuba yo bo mosi.

Mbala ya sambanu: Bana bumba luse na bo ti kanga meso ti tuba yo.

Nkunga: O masumu (O masumu) O masumu yambula!

### MALONGI YA BAKRISTO:

Beto lenda bumbana ve na meso ya Nzambi. Yandi kele kumona beto konso ntangu. Yo yina, mbote bakristo yambula mambu yonso ya mbi ya bo kele kusweka. Mbote beto yantika kulemvuka na Nzambi. Yula kana bo ke na mambu bo me zola kubumbila Nzambi. Bo lenda ndima yo na lombilu, ebuna Nzambi ta pesa bo ngolo sambu bo lenda yambula mambu yina. Yimba diaka: Yesu kele mona nge (mbala 3) Ntangu yai!

### KUBINGA NA YESU:

Kana nge me yamba Yesu ntete ve, nge mpe lenda bumba yo ve na meso ya Nzambi. Nzambi ke mona ntima na nge. Kana nge me yamba Yesu ntete ve, Yandi kele kutanga nge ve bonso mwana na Yandi. Mbote nge bika imbi na nge ti kwisa yamba Yesu bubu. Kana nge zola yamba Yesu kaka bubu, kwisa vanda na kiti yai (songa kiti mosi) na nima ya Ecodim. Mono ta kwisa kusadisa nge.

#####

### Leso 2. NZAMBI LANDA YONASI

Yonasi 1:4-16, 2:1

**KULONGA MIKANDA YA BIBLE:** Tuba diaka bandambu zole ya Bible. Yonasi kele na ndambu ya ntete--Kuwakana ya Ntama.

**KIKUMA YA LESO:** Kuzaba nde, ata muntu zola tina Nzambi, Nzambi kele kusosa yandi kaka. Beto meka kutina Nzambi ve, kansi beto kudipesa na Yandi.

**REVISIO:**

Sambu na inki Nzambi zolaka Yonasi kukwenda na Nineve? (Sambu bo balula ntima.) Yonasi fweti sala inki na Nineve? (Samuna bandinga ya Nzambi ta songa yandi.) Sambu na inki yandi zolaka kulemfuka ve? (Nineve vandaka mbeni ya Bayuda.) Yandi salaka inki ya songaka nde yandi vandaka kutina Nzambi? (Kwendaka na Tarsisi.)

**VERSE YA KUTUBA:** Luke 19:10

**KUYANTIKA LESO:** Songa histoire ya ke songa muntu ya salaka mambu mosi ya vandaka mayele ve. Mbala mingi beto bantu ke sala mambu ya kele mayele ve. Yonasi mpe salaka mambu ya vandaka mayele ve. Yandi zolaka kutina Nzambi!  
Yimba diaka: Yandi tinaka Nzambi, O Mawa!

**MAMBU YA NENE NA LESO YAI:**

1. Nzambi tinda mupepe ya ngolo.

A. Tanga Yonasi 1:4

B. Bana sala theatre. Bo yonso sala bonso mupepe ya nene, bo nikana, bonso mupepe ke nikisa bo.

C. Yimba: Nzambi tindaka mupepe--ya ngolo! (Ton: Yesu Azali Awa)

2. Bantu ya maswa kuwa boma.

A. Tanga 1:5-6.

B. Bana sala theatre ke songa mambu yai: Bo songa boma, bo samba (biteki na bo), losa bima na masa, mfumu na bo tedimisa Yonasi.

C. Yimba: Boma simbaka bo ngolo! O boma!

3. Nzambi songa masumu ya Yonasi.

A. Tanga 1:7-10

B. Bana sala theatre ke songa mpila bo bulaka zeke. Bo yonso songa Yonasi musapi.

C. Yimba: Masumu kumonikaka! Na bantu!

4. Bo losa Yonasi na masa.

A. Tanga 1:11-16

B. Bana sala theatre ke songa masa ke nikana kuluta ngolo--kuluta ngolo! Kuluta ngolo! Bo samba Nzambi, ebuna bo losa Yonasi na masa, ebuna mupepe mana. Bo samba Nzambi diaka.

C. Yimba: O, Yonasi ke dinda! Na Masa!

5. Mbisi mina Yonasi.

A. Tanga 1:17

B. Bana kangula maboko bonso yo kele munoko ya mbisi, bo kanga Yonasi. Bo mina yandi. Yonasi kufwaka ve, kansi yandi vandaka na moyo na kati ya divumu ya mbisi.

Every Child Ministries (Ministères pour Chaque Enfant)

Yonasi—Baleso 9 sambu na bana par Mama Lorella Rouster

[www.teachingforafrica.com](http://www.teachingforafrica.com)



C. Yimba: Mbisi minaka Yonasi! O mawa!

**MALONGI YA BAKRISTO:** Na inki mambu nge me zola kutinda Nzambi? Inki mambu na luzingu na nge nge me zola kubumbila Yandi? Yandi ke zaba yo dezia. Yandi kele kulanda nge kaka. Sesepiyai, tanga mambu yina na lombilu. Sosa pardo ya Nzambi. Lomba lusadisu na Yandi na mambu yina. (Kana bana me yela, bo lenda sonika inki mambu bo me zola kubumbila Nzambi.)

**KUBINGA NA YESU:** Kana nge me yamba Yesu ntete ve na ntima na nge, Nzambi mpe ke zaba yo. Nge lenda bumbila pasteur to bantu ya nkaka. Bo lenda banza nde nge kele mukristo. Kansa mpila kubumbila Nzambi ikele ve. Yandi ke zaba ntima na nge. Yandi ke zaba kana nge kele mukwikidi ya kieleka. Kana nge zola yamba Yesu bubuyai, kwisa vanda awa (songa kisika) na nima ya ecodim, sambu beto lenda sadisa nge.

#####

**Leso 3. YONASI VUTUKA NA NZAMBI**

Yonasi kapu 2

**KULONGA MIKANDA YA BIBLE:** Yula bana bandambu zole ya Bible. Yula bo mukanda ya Yonasi kele na inki ndambu. Yula bo inki mambu ya nene beto ke mona na Kuwakana ya Ntama.

Kuwakana ya Ntama mpe kele na bandambu--bandambu iya. Ya ntete kele mikanda ya Moise sonikaka. Mikanda ya Moise ke songa mpe bansiku ya Nzambi. Ya zole kele mikanda ya histoire ya Bayuda. Ya tatu kele mikanda ya poesie. Mingi ya mikanda yina kele bankunga. Ya iya kele mikanda ya bamitubi ya Nzambi. Mukanda ya Yonasi ikele mosi na ndambu yai ya nsuka--mikanda ya bamitubi ya Nzambi. Yonasi mpe vandaka mutubi ya Nzambi.

**KIKUMA YA LESO:** Kuzaba nde beto bakristo mbala mingi ke vilaka nzila ya Nzambi, ke salaka masumu. Kana beno me zaba masumu na beto, beto lenda vutuka na Nzambi. Kana beto ndima ti yambula masumu, Yandi ta yamba beto. Mbote bakristo ya me-bwa na masumu kuvutuka na Nzambi.

**REVISIO:** Beto mpe me mona mutubi mosi ya Nzambi ya vilaka nzila. Nzambi songaka yandi kukwenda wapi? (Nineve, sika bambeni ya bantu na yandi vandaka kuzinga). Kansi Yonasi kwendaka wapi? (Tarsisi, ya vandaka ntama ti sika ya Nzambi songaka yandi) Inki Nzambi tindaka sambu Yonasi lenda zaba nde yandi me vilaka nzila? (Ntembe ya ngolo na masa) Bantu na masuwa monaka bonso bo ta fwa, ebuna na nsuka bo salaka inki ti Yonasi? (Bo losaka yandi na masa.)

**KUYANTIKA LESO:** Sala theatre na kusonga mama mosi ya vilaka nzila ya mfinda, ebuna yandi monaka mpasi mingi na nzila. Keti beno banza nde mama fweti vutuka na nzila? Songa yandi, "Mama, vutuka na nzila"

**MAMBU YA NENE YA LESO YAI:**

1. Nzambi tinda mbisi sambu na kumina Yonasi

A. Tanga Yonasi 2:1 kitini ya ntete

B. Bana tatu sala theatre. Mosi vanda ndinga ya Nzambi ya ke tuba na mbisi, mosi vanda Yonasi na kati ya masa, ti mosi vanda mbisi. Mbisi kangula maboko bonso yo ke kangula munoko, ebuna yo simba Yonasi.

C. Nkunga, ton ya Yesu Azali Awa: Mbisi minaka yandi (mbala 3) O mawa!

2. Yonasi sala bilumbu 3 na divumu ya mbisi

A. Tanga Yonasi 2:1, kitini ya nsuka

B. Sala theatre kusonga boma ti mpasi ya Yonasi na divumu ya mbisi. Bana lenda tanga lumbu ya ntete, ya zole, ya tatu.

C. Nkunga, ton ya Yesu Azali Awa: Yandi monaka mpasi (mbala 3) O mawa!

3. Yonasi samba Nzambi ti ndima masumu na yandi

A. Tanga Yonasi 3:2-3, 10

B. Sala theatre ya mpila Yonasi sambaka Nzambi na divumu ya mbisi.

C. Nkunga: Mono ata lemvuka (mbala 3) Ntangu yai!

4. Nzambi songa mbisi kuluka Yonasi

A. Tanga Yonasi 2:11

B. B. Sala theatre--bana yonso sala bonso bo kele mbisi ke mina Yonasi. Yonasi telema kusonga nde yandi me basika, kele na masa diaka ve, kansi na zulu ya ntoto!

C. Nkunga: Mbisi lukaka yandi (mbala 3) Na ntoto!

Kumanisa Leso: Yonasi silaka Nzambi nde yandi ta sala bonso Nzambi zola. Keti mbala yai yandi kieleka ta lemfuka? Beto ta songa beno na mposo ke kwisa.

**MALONGI YA BAKRISTO:** Vanda na ntangu ya lombilu, konso muntu kulomba Nzambi na nsi ya ntima na yandi, kulomba pardo ya masumu yonso. Kuvutuka na Nzambi lomba mpe nde beto lemvuka na Yandi. Kana mwana ke na probleme yandi zola solula, yandi lenda nangula diboko. Na nima ya ecodim, nge ta mona bana yina sambu na kusadisa bo kuzaba inki mutindu bo lenda tina masumu.

**VERSE YA KULONGUKA:**

Yesaya 44:22, kitini ya nsuka: "Kwisa vutuka na mono, mono muntu ke gulusaka nge."

Repeter mbala 6. Bana lenda sala bonso "echo". Nge ta kabisa bana na bandambu tatu. Nge ta tuba konso phrase na ndinga ya ngolo. Ndambu ya ntete ya bana ta tuba yo na ndinga kaka ndambu ngolo. Ya zole ta tuba yo ndambu pima, ya tatu ta tuba yo pima mingi. Sala kiteso mosi na konso kitini. Bana lenda sala na geste bonso bo ke binga muntu. Bo mpe lenda balula sambu na kutuba yo.

**YIMBA:** Nzambi kele sosa nge! (Mbala 3) Ntangu yai!

**KUBINGA NA YESU:**

Kana bana ya nkaka ke zaba ve ya kieleka nde bo kele bana ya Nzambi kansi bo zola yamba Yesu bubuyai, bo lenda bikala na nima ya ecodim. Songa bo kisika bo lenda vanda. Nge lenda sadisa bo ntete, na nima bakristo ya zola kubika masumu.

#####

Every Child Ministries (Ministères pour Chaque Enfant)  
Yonasi—Baleso 9 sambu na bana par Mama Lorella Rouster

[www.teachingforafrica.com](http://www.teachingforafrica.com)



## LESO 4 NZAMBI TESA YONASI MBALA YA ZOLE

Yonasi 3:1-4

**KIKUMA:** Kuzaba nde, ata nge me bwa na masumu, Nzambi zola kutedimisa nge. Yandi lenda tesa nge mbala ya zole kana nge ta vutuka na Yandi.

### KULONGUKA MIKANDA YA BIBLE:

Reviser: Bible ya mvimba keke na bandambu ikwa? (2)

Bandambu yina keke inki? (Kuwakana ya Ntama ti Kuwakana ya Mpa)

Bandambu ya Kuwakana ya Ntama keke ikwa? (4)

Bandambu yina keke inki? (Mikanda ya Moise, ya histoire, ya poesie, ti ya bamitubi)

Mukanda ya Yonasi keke na Kuwakana ya Ntama to ya Mpa? (ya Ntama)

Mukanda ya Yonasi keke na inki ndambu ya Kuwakana ya Ntama? (na mikanda ya bamitubi)

Yika malongi yai:

Mikanda ya bamitubi keke 17-- 5 mikanda ya ndaa, ya nene; ti 12 mikanda ya nkufi, ya fioti.

Yonasi keke mosi na kati ya mikanda 12 ya nkufi. (Yo keke na kaka bakapu 4.) Yonasi keke na mikanda ya bamitubi sambu yandi mpe vandaka mutubi ya Nzambi.

**REVISIO:** Na histoire ya beto ke landa, beto me bika Yonasi wapi? (Na mukidi ya masa, sika mbisi me luka yandi) Inki Nzambi songaka yandi kusala mbala ya NTETE? (Kukwenda kusamuna na Nineve)

Inki Yonasi salaka ntete? (Yandi tinaka--lemvukaka ve. **YANDI BEBISAKA.**) Bana tuba mbala 3: **NTETE, YANDI BEBISAKA.**

**KUYANTIKA LESO:** Solula ti bana inki mutindu muntu ta monika kana yandi me sala bilumbu tatu ya divumu ya mbisi, ti inki mutindu Yonasi waka na ntima. Muntu mosi sala theatre bonso yandi keke Yonasi na nima ya mbisi me luka yandi na mukidi ya masa. Yonasi vutukaka na Nzambi ntangu yandi sambaka Nzambi na kati ya divumu ya mbisi yina. Bambuka nde yandi tubaka, "Mono ta sala yonso."

**YIMBA:** "Mono ata lemvuka, ntangu yai" (Ton: Yesu azali awa)

### MAMBU YA NENE YA LESO YAI:

1. Nzambi binga Yonasi mbala ya zole.

A. Tanga Yonasi 3:1-2 na malembe yonso.

B. Nzambi songaka Yonasi kusala inki mbala ya zole? (Kukwenda samuna na Nineve--kaka kiteso mosi bonso yandi songaka yandi mbala ya ntete)

C. Sala theatre ya mpila Nzambi bingaka Yonasi mbala ya zole

D. Yimba: "Nzambi bingaka diaka, Yonasi" (ton: Yesu azali awa)

**MALONGI YA BAKRISTO:** Ata nge me bwa, ata nge me bebisa yina ya Nzambi songaka nge, Nzambi zola tedimisa nge. Yandi zola kutesa nge mbala ya zole, kana nge ta kaka vutuka na Yandi.

YIMBA: Ata nge me bebisa (yimba mbala tatu) Vutuka na Yesu! (ton: No. 53, Bankunga ya Kiese)

Lombilu sambu na bakristo ya zola vutuka na nzila: Kana bana ya nkaka kele bakristo, kansi bo zaba nde bo me bwa, bo lenda telema ntangu yai. Tula bo na lombilu.

VERSE YA KULONGUKA: Yesaya 44:22 diaka. Bana tuba yo mbala zole, na nima bana 4 meka kutuba yo bo mosi.

Beto landa diaka lesa ya Bible:

2. Yonasi Lemfuka--Kwenda na Nineve.

- A. Tanga Yonasi 3:3 na malembe yonso.
- B. Inki mutindu Yonasi lemfukaka na Nzambi? (kwendaka na Nineve) Bwala Nineve vandaka inki mutindu? (Nene mingi).
- C. Sala theatre ya mpila Yonasi ke kwenda na Nineve. Yandi tambulaka mingi sambu yo vandaka mwa-ntama. Bana yonso lenda tambula na nzila tii bo kuma na sika ya nkaka ya beto ta tuba kele Nineve.
- D. Yimba: "Ee, Yonasi kwendaka, na Nineve" (Ton: Yesu azali awa)

3. Yonasi samuna na Nineve.

- A. Tanga Yonasi 1:4 na malembe yonso.
- B. Yonasi salaka inki na Nineve? (samuna to songa bo ndinga ya Nzambi) Inki malongi yandi pesaka bo? (Na nima ya bilumbu 40 Nzambi ta fwa bwala Nineve.)
- C. Sala theatre ya mpila Yonasi ke samuna.
- D. Yimba: "Nzambi ta fwa bwala yai, O mawa!" (ton: Yesu azali awa)

Kumanisa Leso: Mawa sambu na bwala Nineve! Kansi kiese, kiese, kiese sambu na Yonasi, sambu yandi me lemfuka na Nzambi. KETI BANTU YA NINEVE TA WILA MALONGI YA YONASI? Kwisa na mposo ke kwisa--beto ta mona kana bo ta kuwa.

KUBINGA NA YESU:

Kana nge ne ndima Yesu ntete ve, zaba nde, bonso bwala Nineve vandaka na bilumbu 40 kaka me bikala na bo, Nzambi zaba nombre ya bilumbu ya me bikala na nge. Kana nge kufwa bubuyai, nge ta kwenda wapi? Yesu zola gulusa nge bubu kana nge ta tula ntima na Yandi.

Yimba: Kwisa na Yesu Kristo! (mbala tatu) Nge ata guluka! (Ton: No. 53, BK)

#####

LESO 5 NINEVE BALULA NTIMA

Yonasi 3:5-10

KIKUMA YA LESO: Kuzaba nde, kana ya kieleka muntu me balula ntima, yo fweti monika na bisalu to na luzingu na yandi. Beto balula ntima ya kieleka.

**MIKANDA YA BIBLE:** Yonasi ikele mukanda ya tanu na kati ya mikanda ya nkufi ya bamitubi ya Nzambi. Longuka mikanda tanu ya ntete yina. Kana bana ikele na Bible, sadisa bo kumona mukanda ya Yonasi.

**VERSE YA KULONGUKA:** Matayo 3:8 (Tuba yo mbala 6, mutindu na mutindu.)

**KUYANTIKA:** Kana muntu tubaka nde me bikala bilumbu 40, Nzambi ta fwa bwala yai, nge ta sala inki? (Reviser malongi ya Yonasi na Nineve.)

**MAMBU YA NENE YA LESO YAI:**

1. Bantu ya Nineve kwikila Nzambi.

- A. Tanga Yonasi 3:5 na malembe yonso.
- B. Inki mutindu bo songaka nde bo kwikilaka? (Bo kudiaka ve, ti bo lwataka basaki sambu na kusonga mawa sambu na masumu na bo.)
- C. Sala theatre ya bantu ke buya madia, ke lwata basaki.)
- D. Yimba "Nzambi ta kufwa beto! O mawa!" (Ton: Yesu azali awa)

2. Mfumu ya Nineve balula ntima.

- A. Tanga 3:6-9 na malembe yonso.
- B. Inki mutindu Mfumu songaka nde yandi kwikilaka? (Yandi kulumukaka na kiti na yandi ya kimfumu, yandi katulaka bilele na yandi ya kimfumu, yandi lwatak basaki, yandi tulaka putulu ya tiya na nitu, yandi vandaka na zulu ya ntoto. Tala na mambu yonso yandi vandaka kudikulumusa na ntuala ya Nzambi.)  
Inki nsiku Mfumu tulaka? (Bo lenda kudia ve, kunwa ve, ata bantu, ata bambisi.  
Bo yonso fweti lwata basaki. Bo fweti lomba Nzambi ngolo. Bo fweti bikisa imbi ya bo).  
Sambu na inki bo fweti sala mpidina? (Mbala ya nkaka Nzambi ta wila bo mawa, sambu bo vila ve.)
- C. Sala theatre ya ke songa Mfumu ya Nineve ke wa mawa, ke lwata basaki, ke tula putulu ya tiya, ke vandaka na ntoto. Sala theatre ke songa nde Mfumu ke songa bantu nsiku, bo ke wa. Na nima songa mpila bo vandaka kubuya madia, kulwata basaki, na bambisi mpe, kulomba Nzambi ngolo.
- D. Yimba: Beto balula ntima--Ntangu yai! Beto bikisa imbi--Ntangu yai!

**MALONGI YA BAKRISTO:**

Kana muntu me balula ntima na Yesu, yo ke monika na bikalulu na yandi. (Tuba diaka verse, Matayo 3:8) Inki mutindu luzingu na nge ke songa nde nge kele mukristo? Yula Nzambi sesepiyai kana inki mambu ya nge ke sala ke songa ve nde nge kieleka me balula ntima. (Kinga sambu na lombilu na nsi ya ntima ya konso mwana.)

Yimba: Luzingu fweti changer--Mukristo!

Beto vutuka na malongi ya lesa:

3. Nzambi pindulaka mpe mabanza sambu na bo.

- A. Tanga 3:10 na malembe yonso.
- B. Inki mutindu Nzambi pindulaka sambu na bo? (Yandi wilaka bo mawa, Yandi fwaka bo ve bonso Yandi zolaka kusala ntete.)

Every Child Ministries (Ministères pour Chaque Enfant)  
Yonasi—Baleso 9 sambu na bana par Mama Lorella Rouster

[www.teachingforafrica.com](http://www.teachingforafrica.com)



C. Sala theatre ke songa kiese ya bantu ntangu Nzambi wilaka bo mawa. (Bo lenda yimba, kina,etc.)

D. Yimba ti kina: Beto ata kufwa ve--O kiese!

**KUBINGA NA YESU:** Kana nge me balula ntima ve, Nzambi mpe ta kufwa nge na bilungu, sambu nge mpe ikele muntu ya masumu bonso bantu ya Nineve. Kansi, kana nge ta balula ntima bonso bo, nge mpe ta fwa ve. Keti nge me balula ntima na Yesu Kristo?

Yandi mosi me tuba: "Konso muntu yina ta kwisa na mono, mono ta buya yandi ve." (Yoane 6:37)

Yimba: Kwisa na Yesu Kristo (mbala 3) Nge ata guluka! ( No. 53, BK) Menga n'yandi me lunga (mbala 3) Kukatula imbi! Balula ntima na nge (mbala 3) Bika Yesu kota!

#####

## LESO 6 NZAMBI SONGA YONASI NTIMA NA YANDI

Yonasi 4:1-11

**KIKUMA YA LESO:** Kuzaba nde Nzambi zola basielo na yandi kuvanda na ntima ya mawa ti na luzolo sambu na bantu, mutindu ntima na Yandi ikele. Beto bakristo fweti zola ata bambeni na beto. Beto wila bo mawa, bo lombila bo Nzambi, beto sosa mambote na bo.

**MIKANDA YA BIBLE:** Tuba diaka mikanda 5 ya ntete ya mikanda ya nkufi ya bamitubi ya Nzambi. Tuba mukanda ya kele na ntwala ya Yonasi ti yina ya kele kulanda yo. Mona Yonasi diaka na kati ya Bible.

**YIMBA:** Beto Zolana.

**VERSE YA KULONGUKA:** Matayo 5:44. Bana tuba yo mbala 6, mutindu na mutindu.

### MALONGI YA LESO:

1. Yonasi vandaka na makasi.

A. Tanga 4:1-3 na malembe yonso.

B. Sambu na inki Yonasi vandaka na makasi? (Sambu yandi zolaka nde bantu ya Nineve kufwa kaka. Yandi vandaka na kiese ve nde Nzambi wila bo mawa.) Yandi lombaka Nzambi kusala inki? (Kufwa yandi.)

C. Sala theatre ke songa makasi ya Yonasi ti mpila yandi vandaka kubokuta na Nzambi.

D. Yimba: O Yonasi makasi--O mawa!

2. Yonasi zola kaka nde Nzambi kufwa bantu ya Nineve.

A. Tanga 4:4-5 na malembe yonso.

B. Inki Nzambi yufulaka Yonasi? (Yandi yufulaka Yonasi kana yandi salaka mbote na kuvanda makasi.) Yonasi kwendaka wapi? (Na ndambu ya Est ya bwala Nineve.) Sambu na inki? (Sambu na kumona inki mambu ta bwila bo. Tala nde tii ntangu yai yandi ke zola kaka nde Nzambi kufwa bo kaka.)

C. Sala theatre kusonga Yonasi mpila yandi ke vandaka na ndambu ya Este, ke tala bwala Nineve na makasi.

D. Yimba: Makasi simbaka yandi--O la la!

3. Nzambi sadisa Yonasi.

- A. Tanga 4:6-9 na malembe yonso.
- B. Nzambi pesaka inki sambu na kupesa Yonasi madidi? (Dititi mosi ya yelaka nswalu.) Na nima, Nzambi salaka inki? (Yandi tindaka niama mosi sambu yandi kudia yo, ebuna yo fwaka.)
- C. Sala theatre ke songa Yonasi na kiese na nsi ya madidi. Na nima, katula dititi, ti songa mpila yandi ke na mpasi na nsi ya ntangu, ti mpila yandi ke na makasi.
- D. Yimba: Yonasi waka mpasi--ya tiya!

4. Nzambi longa Yonasi inki ikele mfunu.

- A. Tanga 4:10-11 na malembe yonso.
- B. Yonasi monaka bonso inki vandaka mfunu? (Dititi yina, sambu yo pesaka yandi madidi, ebuna yandi monaka ve mpasi na ntangu.)
- C. Sala theatre: Muntu mosi ta sala bonso yandi kele Nzambi. Na diboko mosi yandi ta songa dititi. (Yai kele yina ya Yonasi monaka mfunu.) Na diboko ya nkaka songa bantu. (Yai kele yina ya Nzambi monaka mfunu.)
- D. Yimba: O, Nzambi zola bantu! Zola bo!

**MALONGI YA BAKRISTO:** Beto bakristo fweti vanda na mabanza bonso Nzambi. Beto fweti zola bantu, ata bambeni na beto. Nani kele mbeni na nge? Nani me pesa nge mpasi? Keti nge ta wila yandi mawa? Keti nge ta tula yandi na lombilu sesepiyai? (Mwana mosi twadisa ntangu ya bisambu sambu na bantu ya me sala bo mpasi.) Muntu na muntu tanga zina ya muntu me pesa bo mpasi, ye tuba, "Nzambi, sakumuna yandi." Solula mambu ya mbote bo lenda sala bantu yai na mposo ke kwisa.

**YIMBA:** Beto Zolana.

**KUBINGA NA YESU:** Nzambi zola nge mingi. Yandi zola ve nde nge mona mpasi na bilungi. Kansi bonso bantu ya Nineve, nge fweti balula ntima. Keti nge ta balula ntima na Yesu Kristo bubuyai? Kana nge zola solula mambu yai, kwisa vanda na sika yai (longi, songa kisika) na nima ya ecodim.

#####

**LESO 7 BETO YINDULA DIAKA MALONGI YA YONASI**

**KIKUMA:** Kuzaba nde Nzambi zola bantu yonso kubalula ntima, ebuna beto tula bavidu na lombilu mpe zabisa bo nsamu ya Yesu.

**VERSE YA KULONGUKA:** 2 Piere 3:9. Tuba yo mbala 6, mutindu na mutindu.

**MIKANDA YA BIBLE:** Yindula diaka bimvuka ya mikanda na Kuwakana ya Ntama--Mikanda ya Moise, ya Histoire, ya Poesie, ya Bamitubi ya Nzambi, ya ndaa ti ya nkufi. Bambuka nde Yonasi ikele mukanda na kimvuka ya nsuka-mikanda ya nkufi ya bamitubi ya Nzambi.

**YIMBA:** Fungula ntemo a yo Yesu akota kuna (Balula nkunga na Kituba--Balula ntima sambu Yesu ta kota kuna)

KUYANTIKA LESO: Songa tiya. Yula nani zola tula musapi na kati na yo.

MALONGI YA NENE YA LESO YAI: Nzambi zola ve nde bantu mona ndola na tiya. Yandi zola bo yonso kuguluka. Yo yina---(Bana repeter konso phrase ti sala bageste mbala tatu.)

- Yandi songaka Yonasi na kusamuna na Nineve.
- Yandi sosaka Yonasi, ata Yonasi vandaka rebelle.
- Yandi tesaka Yonasi, mbala ya zole.
- Yandi lolulaka Nineve, sambu bo balulaka ntima.
- Yandi longaka Yonasi mutindu yandi ke zolaka bantu.

MALONGI YA BAKRISTO: Nzambi zola bantu yonso kuguluka, kansi bo ta guluka kaka kana bo balula ntima. Beto bakristo tula bo na lombilu, ye beto songa bo nsamu ya Yesu. Sesepiyai, yindula mazina ya banduku to bampangi zole ya zaba Yesu ve. (Tula bo na lombilu.) (Pesa bana encouragement na kubinga bo na ecodim to na kusionkila bo.)

KUBINGA NA YESU: Nzambi zola bantu yonso kuguluka, kansi nge ta guluka kaka kana nge tula ntima na Yesu Kristo. Kana nge zola lusadisu na mambu yai, sosa mono na nima ya ecodim bubuyai. Mono zola sadisa nge.

YIMBA: Kwisa na Yesu Kristo (3 fois) Nge ata guluka! (No. 53, BK)

#####

LESO 8 NSUKA YA NINEVE

Mukanda ya Nahumi, 2 Bansangu 32:1-22, 2 Bantotila 19: 36-37

KIKUMA YA LESO: Kuzaba nde, kana bantu balula ntima ve, Nzambi fweti kufwa bo na bilungi. Yo yina, tula ngolo kubenda bantu kubalula ntima na bo.

MIKANDA YA BIBLE: Yonasi kele mukanda ya tanu ya bamitubi ya nkufi. Nahumi kele mukanda ya nsambwadi. Bana lenda tuba mikanda yina:

1 & 2 Bantotila ti 1 & 2 Bansangu kele na kati ya mikanda ya histoire ya Kuwakana ya Ntama.

YIMBA: "Mono kele na nzo kitoko" (Bankunga ya kiese #38) Ton: Do Lord

"Mawa, mawa, kuvanda mwana-Satana"

VERSE YA KULONGUKA: 2 Piere 3:9 diaka. Tuba yo mbala 2, ebuna sola bana 3 na kutuba yo na meso ya bantu yonso. Kana bo zaba yo mbote, bo lenda tuba yo sambu na bambuta na bisambu.

KUYANTIKA LESO: 2 Piere 3:9 ke songa beto nde Nzambi zola nde bantu yonso balula ntima sambu yandi lenda gulusa bo. Yonasi samunaka na Nineve. Bo balulaka ntima, ebuna Nzambi fwaka bo ve. INKI KELE NSUKA YA BANTU KANA BO BALULA NTIMA VE?

MAMBU YA NENE YA LESO YAI:

1. Nineve vutuka na nzila ya imbi

Bamvula 150 na nima ya Yonasi, bantu ya Nineve kumaka imbi mingi diaka. Bankaka na bo ya balulaka ntima, bo kufwaka, ebuna bana na bo yantikaka kusala imbi diaka.

Every Child Ministries (Ministères pour Chaque Enfant)

Yonasi—Baleso 9 sambu na bana par Mama Lorella Rouster

[www.teachingforafrica.com](http://www.teachingforafrica.com)



Kana beto tanga mukanda ya Nahumi na Bible, mpe kana beto tala mambu ya bantotila na bo sonikaka na matadi, beto mona inki mutindu bwala Nineve kumaka:

- A. Tanga baverse yai: 3:1, 16. Yula bana bwala vandaka inki mutindu? (Bwala ya BAMIYIBI)
- B. Tanga verse yai: 1:14b. Bwala vandaka inki mutindu? (Bwala ya BITEKI) Bantu ya ke longuka histoire songa beto nde bo sambaka ngombe ya bakala ya vandaka na luse ya muntu ti mansala ya ndeke.
- C. Tanga verse yai: 3:4. Bwala vandaka inki mutindu? (Bwala ya KINDOKI) Bo fwaka bafami ti bainsi ya mvimba na magie na bo.
- D. Tanga verse yai: 3:1,3. Bwala vandaka inki mutindu? (Bwala ya LUVUNU ti ya MENGA)
- E. Tanga verse yai: 1:9a, 11. Bwala vandaka inki mutindu? (Bo zolaka kunwana ti bantu ya Nzambi.)
- F. Tanga inki Mfumu ya Nineve Senakeribi songaka Mfumu ya bantu ya Nzambi. 2 Bansangu 32: 13, 14 Yandi vandaka inki mutindu? (Muntu ya LULENDO) Nineve vandaka mpe Bwala ya LULENDO. Ntotila na bo Senakeribi tubaka nde yandi vandaka 'Mfumu ya bainso yonso, ata ya bambwetete yonso'
- G. Sala theatre kusonga mutindu Nineve kumaka.
- H. Yimba, "Mawa, mawa kuvanda mwana-Satana"

## 2. Nzambi wila bo mawa.

Nzambi zolaka bo, yo yina Yandi pesaka bo occasion zole diaka ya bo lenda kubalula ntima.

- A. Occasion ya ntete-- 2 Bansangu 32:1-22

Ntotila na bo Senakeribi ziungaka Yerusalemi. Yandi fingaka Nzambi (vs. 15,17,19a). Nzambi tindaka wanzio (vs. 21) sambu na kufwa basolda ya Senakeribi. Senakeribi vutukaka na Nineve na nsoni. Senakeribi monaka nde Nzambi kele na ngolo yonso, kansi yandi balulaka ntima ve. Yandi vutukaka na Nineve ti yantikaka kusamba kiteki na yandi. Bana zole na yandi Senakeribi kotaka kisika ya yandi vandaka kusamba kiteki yina, ebuna bo fwaka tata na bo. Mwana ya nkaka ya Senakeribi kumaka ntotila ya Nineve na nima ya tata, kansi yandi landaka kaka kusala imbi, mpe kubuya Nzambi (21b).

Sala theatre ke songa mambu yai.

Yimba: Mawa, Mawa, kuvanda mwana-Satana. Kiese, kiese, kuvanda mwana ya Nzambi.

- B. Occasion ya zole--Mukanda ya Nahumi Nzambi tindaka mutubi ya zole (\*ya ntete vandaka Yonasi). Zina ya mutubi ya zole: Nahumi. Yandi vandaka kusonga bo imbi na bo mpi ndola ya Nzambi fweti pesa bo.

Tanga Nahumi 1:2-3, 2:2a,14a, 3:1,7,19a

Nzambi zolaka gulusa bo, kansi bonso Senakeribi, bo buyaka kubalula ntima na bo.

Sala theatre ke songa Nahumi ke samuna na Nineve, bantu ke wa ve.

Yimba: Mawa, mawa kuvanda mwana-Satana

3. Nzambi pesa bo ndola.

Bo balulaka ntima ve na malongi ya Nahumi, yo yina Nzambi fwaka bwala Nineve.

Bantu ya Mede ti ya Babylon fwaka bwala yonso na mvula 612 na ntwala ya Yesu. Bonso Nahumi tubaka, bantu tungaka yo diaka ve. Na nima, zelo ya desert fulukaka na zulu na yo ti fikaka yo yonso.

Bwala Nineve vandaka na ntoto ya beto bubu ke binga Iraqi. Tii bubu bantu me tunga yo diaka ve, sambu Nzambi pesaka bo ndola yina. Bonso Nahumi 3:19 tubaka, "mpila ya kutelema diaka ikele ve" sambu na bwala Nineve.

Kifwanisu: Tula ndambu bainzo ya mikobodi na zulu ya mesa. Kufwa yo na mbele, ebuna zika yo na zelo sambu na kusonga ndola ya Nineve.

Yimba: Mawa, mawa, kuvanda mwana-Satana

KUBINGA NA YESU: Kana bantu balula ntima ve, Nzambi fweti kufwa bo sambu na masumu na bo. Mawa na bantu ya buya kubalula ntima. Keti nge me balula ntima na nge? Kana nge me balula ntima ntete ve, kansi bubu nge zola, kwisa solula na mono na nima ya ecodim. Mono ta sadisa nge.

Yimba: Kangula ntima, sambu Yesu ta kota kuna!

MALONGI YA BAKRISTO: Keti nge bakisa nde Nzambi ta pesa ndola na bantu yonso ya balula ntima ve? Nge ke sala inki sambu na kubenda bampangi ti banduku na nge na Yesu? Keti nge ke tula bo na lombilu? Keti nge ke solula ti bo? Keti nge me benda bo kukwisa na ecodim sambu bo mpi lenda kuwa ndinga ya Nzambi?

Yimba: Mawa, mawa kuvanda mwana-Satana! O mawa! O mawa!  
Kiese, kiese kuvanda mwana ya Nzambi! O kiese! O kiese!

#####

**LESO 9 NZAMBI KELE NA NGOLO NA KUSADISA BETO**

(Leso yai kele mbote konso ntangu, kansi yo kele mbote mingi na ntangu ya Paki.)

Yonasi 2:1,2,7,10, Matayo 12:40, Filipo 3:10a

KIKUMA YA LESO: Kuzaba nde, ata mpasi me luta mingi ti beto ke mona bonso mpila ikele diaka ve, Nzambi kele na NGOLO NA KUSADISA beto kana beto lomba kaka lusadisu na yandi.

MIKANDA YA BIBLE: Bambuka diaka bimvuka zole ya nene ya Bible ya mvimba. Mukanda ya Yonasi kele na Kuwakana ya Ntama (na ntwala ya Yesu), kansi Matayo ti Filipo kele na Kuwakana ya Mpa (na nima ya Yesu). Matayo kele mukanda ya ntete na Kuwakana ya Mpa.

YIMBA: Nzambi ke ngolo--kusadisa beto! (Tone: Nzambi ke mbote) Nzambi ta kuwa nge-na zina ya Yesu! Yandi ta sadisa-na zina ya Yesu! (No. 49, BK)

VERSE YA KULONGUKA: Filipo 3:10a Tuba yo mbala 6, mutindu na mutindu.

KUYANTIKA LESO: Sala theatre na kusonga mpasi mosi ya mwana ke mona ya yandi ke mona ngolo bonso mpila ke diaka ve. Yula bana inki bo ke mona na kati ya luzingu na bo ya bo ke mona ngolo bonso mpila ikele ve. Pesa nzila na bo kupesa mvutu.

#### MAMBU YA NENE YA LESO YAI:

##### 1. Nzambi sadisa Yonasi na ngolo na yandi

- A. Tanga diaka Yonasi 2:1
- B. Inki mpasi Yonasi monaka? (Yandi vandaka na divumu ya mbisi bilumbu 3 ti mpimpa 3.)
- C. Tanga diaka Yonasi 2:2,7
- D. Inki Yonasi salaka sambu na mpasi na yandi? (Sambaka Nzambi.)
- E. Yula bana, Beto sala inki na ntangu ya mpasi? Bo vutula, "Beto lomba Nzambi." (Tuba mbala mingi.)
- F. Sala theatre ke songa bantu ke lomba Nzambi.
- G. Tanga diaka Yonasi 2:10
- H. Inki mutindu Nzambi sadisaka Yonasi? (Songaka mbisi kuluka yandi na mukedi)
- I. Yimba "Nzambi ke ngolo!"

##### 2. Nzambi tedimisa Yesu na lufwa na ngolo na yandi.

- A. Tanga Matayo 12:40 (Yesu tubaka bandinga yai na ntwala ya lufwa na Yandi.)
- B. Yesu tubaka nde Yandi ta vanda bonso Yonasi. Inki mutindu Yandi ta vanda bonso Yonasi? (Bonso Yonasi vandaka bilumbu ti mpimpa 3 na divumu ya mbisi, Yesu mpe ta vanda bilumbu ti mpimpa 3 na kati ya maziamu. Bonso Nzambi basisaka Yonasi na moyo na kilumbu ya tatu, Yandi mpe ta tedimisa Yesu na lumbu ya tatu.)
- C. Sala theatre. Mwana mosi vanda Yesu, bonso yandi ke na lufwa na maziamu. Bana ya nkaka tanga "Kilumbu ya ntete, kilumbu ya zole, kilumbu ya tatu!" Ebuna mwana yina telema, bonso na lufwa.
- D. Yimba "Nzambi ke ngolo!"

##### 3. Ntumwa Paulo zolaka kuzaba ngolo ya Nzambi.

- A. Tanga Filipino 3:10a (Bana lenda tuba yo diaka.)
- B. Inki vandaka mambu zole Ntumwa Paulo zolaka kuzaba? (Yesu Kristo ti ngolo ya Nzambi ya tedimisaka yandi na lufwa.)
- C. Sala theatre ya Ntumwa Paulo ke lomba ngolo ya Nzambi kusadisa yandi.
- D. Yimba "Nzambi ke ngolo!"

#### MALONGI YA BAKRISTO:

Ngolo ya Nzambi--

ya basisaka Yonasi na divumu ya mbisi---ya tedimisaka Yesu na lufwa---

ya sadisaka ntumwa Paulo na kisalu na yandi---Ngolo yai lenda sadisa nge mpe na bampasi yonso.

Yindula diaka bampasi ya bana tangaka na luyantiku ya lesu. Vanda na ntangu ya lombilu sesepiyai sambu na bampasi yina, ti songa bana kulanda kaka kusamba na kati ya banzo na bo sambu Nzambi lenda sadisa bo.

Yimba: "Nzambi ke ngolo!" (Ton: Nzambi ke Mbote!)

KUBINGA NA YESU: Kana nge me tula ntima na Yesu ntete ve, zaba nde, Nzambi kele na ngolo kugulusa nge kana nge ta balula ntima na Yesu Kristo. (Tanga Yoane 1:12). Mono ta vanda na kiese kusadisa nge kana nge ta kwisa solula ti mono.

Yimba: Kwisa na Yesu Kristo, Nge ata guluka! (No. 53, BK)

**Ministeres pour Chaque Enfant, B.P. 4144 Kinshasa 2, Republique Democratique du Congo**  
**Email: [mcekalema\\_relegal@yahoo.fr](mailto:mcekalema_relegal@yahoo.fr)**  
**Website: [www.geocities.com/mcedcr](http://www.geocities.com/mcedcr)**